

MINISTARSTVO PRIVREDE

259

Na osnovu člana 55. stav (2) tačka b) Zakona o organizaciji uprave u Hercegovačko-neretvanskom kantonu („Službene novine HNK“, broj: 9/09), a u vezi sa članom 3. stav (1) Zakona o uvjetima i načinu obavljanja djelatnosti rezanja drveta (Službene novine F BiH broj: 27/97; 25/06) kantonalni ministar privrede uz suglasnost Vlade HNK donosi

PRAVILNIK

**O STRUČNOJ KOMISIJI ZA VRŠENJE
TEHNIČKOG PREGLEDA POSLOVNIH
PROSTORIJA PRAVNIH LICA KOJA
SU REGISTROVANA ZA OBAVLJANJE
DJELATNOSTI REZANJA DRVETA U
PILANAMA, TE VISINU I NAČIN PLAĆANJA
NOVČANE NAKNADE ZA RAD KOMISIJE**

I. OPĆE ODREDBE**Član 1.**

Ovim Pravilnikom se utvrđuje način imenovanja i sastav stručne komisije za vršenje tehničkog pregleda poslovnih prostorija pravnih lica koja su registrovana za obavljanje djelatnosti rezanja drveta u pilanama (u daljem tekstu: Komisija), te visina i način plaćanja novčane naknade za rad Komisije u postupku izdavanja odobrenja za obavljanje djelatnosti rezanja drveta.

Član 2.

Zadatak Komisije je da vrši neposredan uvid u tehničko-tehnološku dokumentaciju i izvedene radove na objektu, utvrđuje ispunjenost minimalno tehničkih uslova u pogledu poslovnih prostorija, odnosno prostora, opremljenosti uređajima i opremom i drugih uslova koje moraju ispunjavati pravne osobe registrovane za obavljanje djelatnosti rezanja drveta.

II NAČIN IMENOVANJA I SASTAV KOMISIJE**Član 3.**

Komisiju imenuje rješenjem Ministar privrede HNK (u daljem tekstu: Ministar).

Član 4.

(1) Komisiju čine predsjednik i 4 člana.

(2) Komisiju iz stava (1) ovog člana rješenjem imenuje Ministar.

(3) Predsjednik Komisije, u saradnji sa voditeljem postupka, za svaki pojedini slučaj, određuje sastav Komisije, u zavisnosti od veličine objekta i složenosti postupka, a što će se unijeti u zapisnik.

Član 5.

(1) Članovi Komisije moraju imati najmanje VII stepen odgovarajuće stručne spreme koja uključuje poznavanje sljedećih oblasti: protivpožarna, građevinska, mašinska, elektrotehnička, zaštita na radu i zdravstveno- sanitarne zaštite.

(2) Najmanje jedan član mora imati stručnu spremu i praksu, koja je određena za lica koja mogu raditi tehničku dokumentaciju za građevinu u koju su smještene mašine i oprema za obavljanje djelatnosti rezanja drveta.

Član 6.

Broj članova i sastav Komisije Predsjednik Komisije određuje prema veličini i složenosti instalisanog kapaciteta za rezanje drveta, i to:

a) MALI pilanski kapaciteti-stacionirane pile i mini gateri sa niskim stepenom mehaniziranosti (tračne i kružne) godišnjeg proreza do 3.000m³ oblovine - Predsjednik Komisije i 2 člana;

b) SREDNJI pilanski kapaciteti- stacionarne pile trupčare i gateri sa srednjim stepenom mehaniziranosti, godišnjeg proreza do 10.000m³ oblovine – Predsjednik komisije i 3 člana;

c) VELIKI – pilanski kapaciteti – mehanizirana linija trupčara i gatara sa uređenom popratnom opremom, uređajima i instalacijama, godišnjeg proreza preko 10.000m³ oblovine- Predsjednik Komisije i 4 člana.

III VISINA I NAČIN PLAĆANJA NOVČANE NAKNADE**Član 7.**

(1) Novčana naknada za rad Komisije (u daljem tekstu: novčana naknada) obuhvata nagradu za rad članova komisije u neto iznosu i zakonski propisane poreze i doprinose u zavisnosti od veličine složenosti kapaciteta za rezanje drveta, a iznosi:

a) za MALE pilanske kapacitete

1) za predsjednika Komisije novčana naknada u neto iznosu ne može biti manja od 150 KM niti veća od 200KM.

2) za člana Komisije novčana naknada u neto iznosu ne može biti manja od 120 KM niti veća od 170 KM.

Hercegovačko-neretvanskog kantona

b) za SREDNJE pilanske kapacitete

1) za predsjednika Komisije novčana naknada u neto iznosu ne može biti manja od 200 KM niti veća od 250 KM.

2) za člana Komisije novčana naknada u neto iznosu ne može biti manja od 170 KM niti veća od 220 KM.

c) za VELIKE pilanske kapacitete

1) za predsjednika Komisije novčana naknada u neto iznosu ne može biti manja od 300 KM niti veća od 400 KM.

2) za člana Komisije novčana naknada u neto iznosu ne može biti manja od 270 KM niti veća od 350 KM.

Član 8.

(1) Visinu novčane naknade utvrđuje Ministar na osnovu troškovnika, kojeg sačinjava predsjednik Komisije, po izvršenom zadatku, za svaki pojedini slučaj.

(2) Prilikom sačinjavanja troškovnika predsjednik komisije uzet će u obzir kapacitet objekta, uloženi rad Komisije i složenost opremljenosti objekta.

(3) Troškovnik iz prethodnog stava sastavni je dio zapisnika o radu Komisije.

Član 9.

Predsjednik i članovi Komisije imenovani iz kantonalnih organa uprave ostvaruju pravo na novčanu naknadu samo ukoliko ispunjavaju uslove propisane Odlukom o načinu obrazovanja i utvrđivanju visine naknade za rad radnih tijela osnovanih od strane Vlade Hercegovačko-neretvanskog kantona i rukovodilaca kantonalnih organa državne službe („Službene novine HNK“, broj: 6/12), dok članovi Komisije koji nisu zaposleni u kantonalnim organima uprave imaju pravo na novčanu naknadu nakon obavljenog zadatka.

Član 10.

(1) Novčanu naknadu plaća stranka po čijem se zahtjevu za odobrenje djelatnosti rezanja drveta pokreće postupak, na žiro račun Budžeta Hercegovačko-neretvanskog kantona, na osnovu Zaključka o određivanju troškova kojeg donosi Ministarstvo.

(2) Nakon što stranka izvrši uplatu novčane naknade na osnovu Zaključka iz stava (1) ovog člana, Ministarstvo donosi Rješenje o visini novčane naknade za rad članovima Komisije koji su stekli pravo na naknadu.

V PRELAZNE I ZAVRŠNE ODREDBE

Član 11.

Postupci koji su započeti prije stupanja na snagu ovog Pravilnika, a u kojima Ministarstvo nije odlučilo o iznosu novčane naknade, nastavit će se prema odredbama ovog Pravilnika.

Član 12.

Rješenje iz člana 3. Pravilnika Ministar je dužan donijeti u roku od 3 mjeseca od dana stupanja na snagu ovog Pravilnika.

Član 13.

Stupanjem na snagu ovog Pravilnika prestaje da važi Pravilnik o stručnoj komisiji za vršenje tehničkog pregleda poslovnih prostorija pravnih lica koja su registrovana za obavljanje djelatnosti rezanja drveta u pilanama, te visini i načinu plaćanja novčane naknade za rad komisije („Službene novine HNK“ broj: 10/08).

Član 14.

Ovaj Pravilnik stupa na snagu osmog dana od dana objave u „Službenim novinama Hercegovačko-neretvanskog kantona“.

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
MINISTARSTVO PRIVREDE

Broj: 07-02a)-02-128-7/15
Mostar, 16.06..2015. godine

Ministar
Amer Zagorčić, s.r.